

摘藻堂四庫全書薈要

史部

欽定四庫全書薈要

史部

元史卷十九至

詳校官主事銜臣徐以坤



欽定四庫全書薈要卷六千三百九十六史部

元史卷十七

明翰林學士亞中大夫知制誥兼修國史宋濂等修

紀第十七

世祖十四

二十九年春正月甲午朔以日食免朝賀日食時左右有珥上有抱氣丙申雲南行中書省言羅甸歸附後改普定府隸雲南省三十餘年今勅羅甸宣慰安撫司隸

湖南省不便乞罷之仍以其地隸雲南省制曰可戊戌

清州饑就陵州發粟四萬七千八百石賑之己亥命太

史令郭守敬兼領都水監事仍置都水監少監丞經歷知

事凡八員八作司官舊制六員今分為左右二司增官

二員庚子江西行省左丞高興言江西福建汀漳諸處

連年盜起百姓入山以避乞降旨招諭復業福建鹽課

既設運司又設四鹽使司今若設提舉司專領鹽課其

酒稅課悉歸有司為便福建銀鐵又各立提舉司亦為

冗濫請罷去詔皆從之禁商賈私以金銀航海壬寅以武平地震全免去年稅四千五百三十六錠今年量輸之止徵二千五百六十九錠癸卯命諤德齊阿里置司邕州以便糧餉而以輕軍邏思明州以漢天師張宗演男與棣嗣其教陞利用監正三品甲辰詔江南州縣學田其歲入聽其自掌春秋釋奠外以廩師生及士之無告者貢士莊田則令覈數入官乙巳賜諸王蘇都爾金一千兩丙午河南福建行中書省臣請詔用漢語有旨

以蒙古語諭河南漢語諭福建罷河南宣慰司以汴梁襄陽河南南陽歸德皆隸河南行省復割湖廣省之德安漢陽信陽隸荆湖北道蘄黃隸淮西道并淮東道三宣慰司咸隸河南省其荆湖北道宣慰司舊領辰沅澧靖歸常德直隸湖廣省從葛蠻軍民安撫使宋子賢請詔諭未附平伐大甕眼紫江皮陵潭溪九堡等處諸洞苗蠻戊申太陰犯歲及軒轅左角己酉興州之興安宜興兩縣民饑賑米五千石罷南雄韶州惠州三路錄事司

壬子桓州至赤城站戶告饑給鈔計口賑之癸丑罷四  
賓庫復會同館初置織造段疋提舉司五八番都元帥  
劉德祿言新附洞蠻十五寨請置官府以統之詔設陳  
蒙爛土軍民安撫司江西行省巴延阿喇卜丹言蒙山  
歲課銀二萬五千兩初置鍊銀一兩免役夫田租五斗  
今民力日困每兩擬免一石帝曰重困吾民民何以生  
從之丙辰播州洞蠻因籍戶懷疑竄匿降詔招集之以  
行播州軍民安撫使楊漢英為紹慶珍州南平等處沿

邊宣慰司行播州軍民宣撫使播州等處管軍萬戶仍  
佩虎符壬戌召嗣漢天師張與棣赴闕二月甲子朔金  
竹酋長纒哩貢馬羶各二十有七從其請減所部貢馬  
降詔招諭之賜新附黑蠻衣襖遣回命進所產朱砂雄  
黃之精善者無則止遣使代祀嶽瀆后土四海乙丑給  
輝州龍山里州和中等縣饑民糧一月丁卯畋于近郊  
命宿衛受月廩及蒙古軍以艱食受糧者宣徽院仍領  
之己巳太陰犯畢發通州河西務粟賑東安固安薊州



寶坻縣饑民申禁鞭背庚午烏魯斯招附桑州生苗羅  
甸國古州等峒酋長三十一所部民十二萬九千三百  
二十六戶詣闕貢獻壬申敕遣使分行諸路釋死罪以  
下輕囚澤州獻嘉禾乙亥立總管高麗女直漢軍舊戶  
府頒銀印總軍六千人以泉府太卿伊克穆蘇鄧州舊  
軍萬戶史弼福建行省右丞高興並為福建行中書省  
平章政事將兵征瓜哇用海船大小五百艘軍士二萬  
人戊寅立征行左右軍都元帥府都元帥四副都元帥

二上萬戶府達嚕噶齊四萬戶皆副萬戶八鎮撫四各  
佩虎符詔加高麗王王睿太保功臣之號詔從諸王阿  
爾圖作亂者多羅岱以付奇爾濟蘇托克克珠以付阿  
里綽爾齊以付頁特密實哈瑪爾以付伊克穆蘇使從  
軍自效又詔諸王從哈坦作亂者納木岱爾之鎮南王  
所訥克林之哈喇哈斯達爾罕罕所阿爾圖之雲南王  
所圖烈圖之阿里所巴爾台之頁特密實所鄂囉羅和  
爾台之東海發義倉官倉糧賑德州齊河清平泰安州

饑民庚辰阿爾婁等言尼雅斯拉昂默呼實都王巨濟  
黨比僧格恣為不法楮幣銓選鹽課酒稅皆更張變亂  
銜命江南理算者皆嚴急輸期民至嫁妻賣女禍及親  
隣維揚錢塘受害最慘無故而隕其生五百餘人其初  
士民猶疑事出國家今乃知天子仁愛元元而使民至  
此極者實僧格及其凶黨之為莫不願食其肉臣等議  
此三人既已伏辜乞依條論坐以謝天下從之雅伊密  
實招無籍民千四百三十六戶請隸東宮詔命之耕田

辛巳從樞密院臣安巴等請就襄陽給察遜塔拉哈喇婁六百三十七戶田菴種粟俾耕而食丁亥以汪惟和為鞏昌等二十四處便宜都總帥兼鞏昌府尹仍佩虎符御史臺阿爾婁崔彧等言馮子振劉道元指陳僧格同列罪惡詔令省臺臣及董文用留夢炎等議其一言翰林諸臣撰僧格輔政碑者廉訪使閻復近已免官餘請聖裁帝曰死者勿論存者罰不可恕也奇爾特布哈等使緬國詔令遥授左丞廷議以尚書行使事其副以

郎中處之制曰可戊子禁杭州放鷹己丑歲星犯軒轅  
大星庚寅宣政院臣言授諸路釋教都總統年扎克鐘  
萬為太中大夫土番等處宣慰使都元帥敕畸零巴圖  
爾三百四十七戶佃益都閒田給牛種農具官為屋居  
之壬辰山東廉訪司申棣州境內春旱且霜夏復霖澇  
饑民啖藜藿木葉乞賑卹敕依東平例發附近官廩計  
口以給三月甲午詔遣托果斯努圖克齊實勒們至哈  
坦納新界與駙馬奇爾濟蘇議行屯田己亥樞密院臣

言出征女直納琳格爾議于哈斯罕三千新附軍內選撥千人詔先調五百人行省具舟給糧仍設征東招討司壬寅御史大夫阿爾婁等奏比監察御史商琥舉昔任詞垣風憲時望所屬而在外者如胡祗遘姚燧王惲雷膺陳天祥楊恭懿高道程文海陳儼趙居信十人宜召寘翰林備顧問帝曰朕未深知俟召至以聞丙午中書省臣言京畿薦饑宜免今歲田租上都隆興平灤河間保定五路供億視他路為甚宜免今歲公賦漢地河

泊隸宣徽院除入太官外宜弛其禁便民取食並從之  
丁未尼雅斯拉昂默呼以盜取官民鈔一十三萬餘錠  
實都以徵理逋負追殺五百二十人皆伏誅王巨濟雖  
無贓帝以與實都同惡并誅之中書省與御史臺共定  
贓罪十三等枉法者五不枉法者八罪入死者以聞制  
曰可戊申以威寧昌等州民饑給鈔二千錠賑之己酉  
以大司農同知宣徽院事領尚饈監事特爾格翰林學  
士承旨通政院使兼知尚乘寺事琳沁並為中書平章

政事兼領舊職中書省臣言右丞何榮祖以疾平章政事敏珠爾丹以久居其任乞令免署惟食祿與議中書省事從之以阿里為中書右丞梁溫都爾為叅知政事

中書省臣言亦奚不薛及八番羅甸既各設宣慰司又復立都元帥府地甚狹而官府多宜合二司帥府為一詔從之且命亦奚不薛與思播州同隸湖廣省羅甸還隸雲南以八番羅甸宣慰使烏魯斯等並為八番順元等處宣慰使都元帥佩虎符以安南國王陳益稷遥授



湖廣等處行中書省平章政事佩虎符居鄂州庚戌車  
駕幸上都賜蘇克烏魯斯賽音布哈蠻夷之長五十六  
人金紋綾絹各七十九疋及弓矢鞍轡壬子樞密院臣  
奏延安鳳翔京兆三路籍軍三千人僧格皆罷為民今  
復其軍籍屯田六盤從之敕都水監分視黃河堤堰罷  
河渡司庚申免寶慶路邵陽縣田租萬三千九百七十  
三斛壬戌給還嘉木揚喇勒智土田人口之隸僧坊者  
初嘉木揚喇勒智重賂僧格擅發宋諸陵取寶玉發冢

一百一戕人命四攘盜詐掠諸賊鈔十一萬六千二百  
錠田二萬三千畝金銀珠玉寶器稱是省臺諸臣乞正  
典刑以示天下帝猶貸之死而給還其人口土田隆興  
府路饑給鈔二千錠復發粟以賑之夏四月丙子太陰  
犯氐己卯復典瑞監三品弛甘肅酒禁榷其酤辛巳弛  
太原酒禁仍榷酤辛卯設雲南諸路學校教官以蜀士  
充五月甲午遼陽碩達勒達女直饑詔呼圖克布哈趣  
海運給之丙午敕雲南邊徼入朝非初附者不聽乘傳

進馬不給芻豆丁未中書省臣言妄人馮子振嘗為詩  
譽僧格且涉大言及僧格敗即告詞臣撰碑引諭失當  
國史院編修官陳孚發其姦狀乞免所坐遣還家帝曰  
詞臣何罪使以譽僧格為罪則在廷諸臣誰不譽之朕  
亦嘗譽之矣詔以楊居寬郭佑死非其罪給還其家資  
改思州安撫司為軍民宣撫司隸湖廣省詔諭其民因  
閱戶驚逃者各使安業以陝西鹽運司酒稅等課已入  
州縣罷諸子鹽司併罷東平路河道提舉司事入都水

監已未龍興路南昌新建進賢三縣水免田租四千四  
百六十八石是月真定之中山新樂平山獲鹿元氏靈  
壽河間之滄州無棣景之阜城東光益都之濰州北海  
縣有蟲食桑葉盡無蠶六月甲子平江湖州常州鎮江  
嘉興松江紹興等路水免至元二十八年田租十八萬  
四千九百二十八石戊辰詔聽僧食鹽不輸課己巳日  
本來互市風壞三舟惟一舟達慶元路壬申江西省臣  
言肇慶德慶二路封連二州宋時隸廣東今隸廣西不

便請復隸廣東詔從之鐵旗城後齊蘇哲爾率其族類  
部曲三千餘戶來附甲戌設司籍庫秩從五品隸太府  
監儲物之籍入者丙子大寧路惠州連年旱澇加以役  
繁民饑死者五百人詔給鈔二千錠糧一月賑之仍遣  
使責遼陽省臣阿薩爾壬午敕以海南新附四州洞寨  
五百一十九民二萬餘戶置會同定安二縣隸瓊州免  
其田租二年癸未以征瓜哇暫禁兩浙廣東福建商賈  
航海者俟舟師發後從其便丁亥湖州平江嘉興鎮江

揚州寧國太平七路大水免田租百二十五萬七千八百八十三石己丑太白犯歲星特穆爾岱爾碩色克圖尼固爾岱庫庫所部饑詔給米四千石付特穆爾岱爾碩色克圖一千石付尼固爾岱庫庫賑之閏六月辛卯朔陞上都兵馬司四品如大都丁酉遼陽瀋州廣寧開元等路電害稼免田租七萬七千九百八十八石岳州華容縣水免田租四萬九百六十二石東昌路蝗壬寅以東安海寧改隸淮安路詔大都事繁課稅改隸轉運

司通州造船畢罷提舉司罷福建歲造象齒犛帶戊申  
熒惑犯狗國庚戌回回人和卓穆蘇售大珠帝以無用  
却之辛亥河西務水給米賑饑民江北河南省既立詔  
江北諸城悉隸其省詔漢陽隸湖廣省左江總管黃堅  
言其管內黃勝許聚衆二萬據忠州乞調軍萬人土兵  
三千人命劉國傑討之臣願調軍民萬人以從詔許之  
太平寧國平江饒常湖六路民艱食發粟賑之高麗饑  
其王遣使來請粟詔賜米十萬石中書省臣言今歲江

南海運糧至京師者一百五萬石至遼陽者十三萬石  
比往歲無耗折不足者甲寅右江岑從毅降從毅老疾  
詔以其子斗崇襲佩虎符為鎮安路軍民總管廣南西  
路安撫副使賽富昂等誹謗朝政沙布昂復資給之以  
風聞三十餘事妄告省官帝以有傷政體捕惡黨下吏  
如法乙卯濟南般陽蝗是月詔廉訪司巡行勸課農桑  
禮部尚書張立道郎中烏爾圖使安南回以其使臣阮  
代乏何維岩至闕陳日燭拜表牋修歲貢秋七月庚申



朔詔以史弼代伊克穆蘇高興將萬人征瓜哇仍召三  
人者至闕遣使檢覈竄名鷹坊受糧者辛酉河北河南  
道廡訪司還治汴梁癸亥完大都城阿爾噶里實沙嘗  
簽僧道儒伊嚕勒昆達實密為軍詔令止隸軍籍甲子  
詔申嚴牛馬踐稼之禁乙丑阿里願自修船同張存從  
征瓜哇軍往招占城甘不察授阿里三珠虎符張存一  
珠虎符仍蠲阿里父本布所負鄂拓克鈔三千錠丙寅  
罷徽州路錄事司免屯田租一萬二千八百十一石辛

未太陰犯牛壬申建社稷和義門內壇各方五丈高五尺白石為主飾以五方色土壇南植松一株北墉瘞坎壘垣悉倣古制別為齋廬門廡三十三楹戊寅黎兵百戶鄧志願謀叛伏誅庚辰敕雲南省擬所轄州縣官如福建二廣例省臺委官銓選以姓名聞隨給授宣敕八月己丑朔賽富鼎處死餘黨杖而徒之仍籍其家產壬辰勅禮樂戶仍與軍站民戶均輸賦丁酉辰星犯右執法己亥太白犯房辛丑寧夏府屯田成功陞其官托爾

齊壬寅括唐古圖爾哈所部庫特齊及河西逃人入蠻地者甲辰車駕至自上都討浙東孟總把等賊敕諸軍之駐福建者聽平章政事舍哩節度乙巳歲星犯右執法丙午用郭守敬言浚通州至大都漕河十有四役軍匠二萬人又鑿六渠灌昌平諸水以廣濟署屯田既蝗復水免今年田租九千二百十八石丁未伊克穆蘇乞與高興等同征瓜哇帝曰伊克穆蘇惟熟海道海中事當付之兵事則委之史弼可也以史弼為福建等處行

中書省平章政事統領出征軍馬庚戌高苑縣高希允以非所宜言伏誅壬子詔達喇齊程鵬飛討黃勝許劉國傑駐馬軍戍守戊午福建行省叅政魏天祐獻計發民一萬鑿山鍊銀歲得萬五千兩天祐賦民鈔市銀輸官而私其一百七十錠臺臣請追其贓而罷鍊銀事從之改燕南河北廉訪司還治真定高麗女直界首雙城告饑敕高麗王以海運內粟賑之弛平灤州酒禁詔布勒圖蒙果勒默色以軍征八百媳婦國九月己未朔治

書侍御史裴居安言頁特密實遇盜起不即加兵盜去  
乃延誅平民詔臺院遣官按問之辛酉詔諭安南國陳  
日燭使親入朝選湖南道宣慰副使梁曾授吏部尚書  
佩三珠虎符翰林國史院編修官陳孚授禮部郎中佩  
金符同使安南山東東西道廉訪司劾宣慰使樂實盜  
庫鈔百二十錠買庫銀九百五十兩官局私造弓勒等  
物受屯田鈔百八十錠樂實宜解職從之丁卯中書省  
臣言茆蕪十圍安化等新附洞蠻凡八萬宜設管軍民

司以其土人蒙意蒙世莫仲文為長官以呂天佑塔布  
岱為達嚕噶齊八番烏魯斯招附光蘭州洞蠻宜置定  
遠府就用其所舉圖罕高守文黃世曾音扎噶為達嚕  
噶齊知府同知判官制曰可癸酉徙沔州治鐸水縣廢  
新得州置通江縣復漢州綿竹縣沙州瓜州民徙甘州  
詔于甘肅兩界畫地使耕無力者則給以牛具農器寧  
夏戶口繁多而土田半蕪紅花詔令盡種穀麥以補民  
食丁丑以平灤路大水且霜免田租二萬四千四十一

石辛巳太白犯南斗罷雲南行臺徙置西川設雲南廉  
訪司壬午碩達勒達女直民由反地驅出者押回本地  
分置萬夫千夫百夫內屯田甲申烏斯藏宣慰司言由  
必里克反後站驛遂絕民貧無可供億命給烏斯藏五  
驛各馬百牛二百羊五百皆以銀軍七百三十六戶戶  
銀百五十五丁亥從宣政院言置烏斯藏納喇蘇古嚕  
遜等三路宣慰使司都元帥冬十月戊子朔詔福建廉  
訪司知事張師道赴闕師道至乞汰內外官之冗濫者

詔敏珠爾丹何崇祖馬紀燕公楠等與師道同區別之  
數月授師道翰林直學士日本舟至四明求互市舟中  
甲仗皆具恐有異圖詔立都元帥府令哈喇岱將之以  
防海道詔浚浙西河道導水入海庚寅兩淮運使尼雅  
斯拉昂坐受商賈賄多給之鹽事覺詔嚴鞠問癸巳弛  
上都酒禁燕公楠言歲終各行省臣赴闕奏事亦宜令  
行臺臣赴闕奏一歲舉刺之數制曰可丙申四川行省  
以洞蠻酋長向思聰等七人入朝壬寅從朱清張瑄請



授高德誠管領海船萬戶佩雙珠虎符復以殷實陶大明副之令將出征水手甲辰星哈喇特納國遣使入覲廣東道宣慰司遣人以暹國主所上金冊詣京師乙巳太陰犯井丁未太陰犯鬼己酉樞密院臣言六衛內領漢軍萬戶見存者六千戶撥分為三力足以備車馬者二千五百戶每甲令備馬十五匹牛車二輛力足以備車者五百戶每甲令備牛車三輛其三千戶惟習戰鬥不他役之六千戶外則供他役庶各勤乃事而兵亦精

銳詔施行之詔擇囚徒罪輕者釋之癸丑鄂勒哲等言  
凡賜諸人物有二十萬錠者為數既多先賜者盡得之  
及後將賜或無可給不均為甚今計集賽台齊哩克昆  
實保齊哈喇齊凡近侍人上等二百戶為率次等半之  
下等又半之於下等擇尤貧者歲加賞賜則無不均之  
失矣一歲天下所入凡二百九十七萬八千三百五錠  
今歲已辦者纔一百八十九萬三千九百九十三錠其  
中有未至京師而在道者有就給軍旅及織造物料館

傳俸祿者自春至今凡出三百六十三萬八千五百四十三錠出數已逾入數六十六萬二百三十八錠矣懷孟竹課歲辦千九十三錠尚書省分賦於民人實苦之宜停其稅帝皆嘉納其言命趙德澤吳榮領逃奴無主者二百四十戶淘銀耕田於廣寧潘州乙卯太陰犯氏十一月庚申岳州華容縣水發米二千一百二十五石賑饑民壬戌太陰犯壘壁陣戊寅樞密院奏一衛萬人嘗調二千屯田茂巴爾斯上都屯田二年有成擬增軍

千人從之己卯太陰犯太微東垣上相癸未禁所在私渡命闕津譏察姦宄丙戌提省溪錦州銅人等洞酋長楊秀朝等六人入見進方物十二月庚寅中書省臣言皇孫晉王噶瑪拉昔鎮雲南給梁王印今進封晉王請給晉王印北安王府尉伊勒古岱司馬鴻和並為晉王中尉仍命布扎爾達魯岱狄琮並為司馬金齒適當蒙果勒默色出征軍馬之衝資其芻糧立為木來府敕應昌府給竒塔特糧五百石以賑饑民癸巳中書省臣言

寧國路民六百戶鑿山冶銀歲額二千四百兩皆市銀以輸官未嘗採之山乞罷之制曰可庚子太陰犯井甲辰太陰犯太微西垣己酉故麓州路軍民總管達嚕噶齊阿薩爾男本巴同趙昇等招木忽魯甸金齒土官忽魯馬男阿魯入見貢方物阿魯言其地東南隣境未附者約二十萬民慕化願附請頒詔旨命本巴趙昇諭之從之壬子敕中書省用烏斯藏站例給哈里呼必二站馬牛羊凡為銀九千五百兩丁巳敕都水監修治保定

府沙塘河堤堰是歲賜皇子皇孫諸王藩戚禁衛邊庭  
將士等鈔四十六萬六千七百十三錠給軍士畸零口  
糧五千五百二十三石賑其乏者為鈔三十六萬八千  
四百二十八錠命國師諸僧呪師修佛事七十二會斷  
死獄七十四

三十年春正月壬戌詔遣使招諭漆頭金齒蠻乙丑敕  
福建毋進鷓戍和琳漢軍四百留百人其餘令耕屯杭  
愛丙寅太陰犯畢命中書汰冗員凡省內外官府二百

五十五所總六百六十九員丁卯安西王請仍舊設常侍不允罷雲南延慶司以洛波卜兒二蠻酋遥授知州各賜璽書戊辰樞密院臣奏烏袞察部鄂摩勒罕軍每歲運米六千四百二十六石以給之計傭直為鈔萬二千八百五十二錠詔邊境無事令本軍屯耕以食庚午驗洞酋長楊總國等來朝尼奇哩女直二百人以漁自給有旨與其漁於水曷若力田其給牛價農具使之耕甲戌河南江北行省平章巴延言揚州孟古台所立屯田

為田四萬餘頃官種外宜聽民耕墾揚州鹽轉運一司  
設三重官府宜削去鹽司止留管勾襄陽舊食京兆鹽  
以水陸難易計之莫若改食揚州鹽蔡州去汴梁地遠  
宜陞散府以頰息信陽光州隸之詔皆從之陞廣州為  
上路總管府罷尼雅斯拉昂默呼所立魚鹽局割江西  
興國路隸湖廣行省乙亥謚皇太子曰明孝丙子西番  
一甸蠻酋三人來覲各授以蠻夷軍民官仍以招諭人  
張道明為達嚕噶齊丁丑太陰犯氐戊寅詔舊隸納延



實納塔拉女直戶四百虛糜廩食令屯田揚州庚辰歲  
星犯左執法立豪懿州七驛辛巳置遼陽路慶雲至哈  
勒巴二十八驛驛給牛三十頭車七輛壬午淮西道宣  
慰使昂吉爾斂軍鈔六百錠銀四百五十兩馬二匹敕  
省臺及扎爾古齊鞫問丁亥遣使代祀嶽瀆東海及后  
土二月己丑從阿喇卜丹燕公楠請以嘉木揚喇勒智  
子宣政院使溫普為江浙行省左丞詔上都管倉庫者  
無資品俸秩故為盜詐宜于六品七品內委用以俸給

之高麗國王王賸請易名曰昨其簽議府請陞簽議司  
降二品印從之減河南江浙海運米四十萬石中書省  
添設檢校二員免大都今歲公賦益上都屯田軍千人  
給農具牛價鈔五千錠以茂巴爾斯董之詔以濟蘇摩  
哩與鬼蠻之民隸詹事院壬辰太陰犯畢丙申却江淮  
行樞密院官布琳濟達進鷹仍敕自今禁戢軍民無從  
禽擾民違者論罪丁酉回回伯克瑪哈瑪迪沙等獻大  
珠邀價鈔數萬帝曰珠何為當留是錢以賙貧者敕海

運米十萬石給遼陽戍兵仍諭其省官色徹肯令拜特  
穆爾部奇徹等耕漁自養糧不須給甲辰中書省臣言  
侍臣傳旨予官者先後七十人臣欲加汰擇不可用者  
不敢奉詔帝曰率非朕言凡來奏者朕祇令諭卿等可  
用與否卿等自處之又言今歲給餉上都大都及甘州  
西京經費浩繁自今賞賜悉宜姑止從之乙巳熒惑犯  
天街丁未車駕幸上都以新附洞蠻吳動鼇為潭溪等  
處軍民官佩金符給新附軍三百人人鈔十錠屯田真

定庚戌太陰犯牛辛亥詔發總帥汪惟和所部軍三千  
征土番又發陝西四川兵萬人以行樞密官明安岱爾  
統之征西番敕以韶贛相去地遠分贛州行院官一員  
鎮韶州復立雲南行御史臺詔沿海置水驛自耽羅至  
鴨渌江口凡十一所令洪君祥董之癸丑太白犯壘壁  
陣江西行院官頁特密實言江南豪右多庇匿盜賊宜  
誅為首者餘徙內縣從之申嚴江南兵器之禁三月庚  
申以同知樞密院事扎薩克知樞密院事以平章政事

范文虎董疏漕河之役平章政事李庭率諸軍扈從上都雨壞都城詔發侍衛軍三萬人完之命中書省給其傭直甲子括天下馬十萬匹己巳立行大司農司洪澤芍陂屯田舊委四處萬戶詔存其二立民屯二十辛未太陰犯氐夏四月己亥行大司農燕公楠翰林學士承旨留夢炎言杭州上海澉浦温州慶元廣東泉州置市舶司凡七所唯泉州物貨三十取一餘皆十五抽一乞以泉州為定制從之仍併温州舶司入慶元杭州舶司

入稅務江南行大司農司自平江徙揚州兼管兩淮農  
事省八番重設州縣官罷徽州錄事司皇孫晉王位立  
內史府詔諸二品官府自今與各部文移相關鞏昌二  
十四城依舊例於總帥汪氏弟兄子姪內選用二人壬  
寅樞密院臣言去年征瓜哇軍二萬各給鈔二錠其後  
祇以五千人往宜徵元給鈔三萬錠入官帝曰非其人  
不行乃朕中止之耳勿徵癸丑太白犯填星廣東肅政  
廉訪司復治廣州甲寅詔遣使招諭暹國烏魯斯請以

八番見戶合思播之民兼管徙宣慰司治辰沅靖州常  
賦外歲輸鈔三千錠不允光州蠻人光龍等一十二人  
及邦崖王文顯等二十八人金竹府馬麟等一十六人  
大龍番禿盧忽等五十四人永順路彭世彊等九十人  
安化州吳再榮等一十三人師壁散毛洞勾答什王等  
四人各授蠻夷官賜以璽書遣歸敕江南毀諸道觀聖  
祖天尊祠五月丙辰朔給四部更番衛士馬萬匹又給  
其筆且齊四百匹壬戌定雲洞蠻酋長來附癸亥括思

播等處亡宋涅手軍丙寅詔委官與行省官閱覈蠻夷  
軍民官以江南民怨嘉木揚喇勒智罷其子江浙行省  
左丞溫普詔以浙西大水冒田令富家募佃人疏決水  
道辛未敕僧寺之邸店商賈舍止其物貨依例收稅丁  
丑中書省臣言上都工匠二千九百九十九戶歲糜官  
糧萬五千二百餘石宜擇其不切於用者俾就食大都  
從之甲申真定路深州靜安縣大水民饑發義倉糧二  
千五百七十四石賑之六月丙戌敕選河西質子軍精



銳者八百給以鎧仗鞍勒狐貉衣裘遣赴皇孫阿南達  
所出征己丑歲星犯左執法庚寅詔雲南旦當仍屬西  
番宣慰司改淮西蘄黃等路隸河南江北行省丙申太  
陰犯斗乙巳以皇太子寶授皇孫特穆爾總兵北邊己  
酉詔濬太湖壬子大興縣蝗易州雨雹大如雞卵秋七  
月丁巳敕中書省官一員監修國史己未詔皇曾孫薩  
克繖出鎮雲南以皇孫梁王印賜之詔免福建歲輸皮  
貨及泉州織作紵絲庚申命知鶴慶府實保齊齋璽書

招諭農順未附蠻寨甲子太陰犯建星己巳命劉國傑  
從諸王伊奇哩督諸軍征交趾免雲南屯田軍逋租萬  
石壬申以伊徹察喇知樞密院事丁丑賜新開漕河名  
曰通惠壬申以濟爾噶呼所汰奇爾濟蘇戶七百屯田  
哈斯罕之地辛巳太陰犯鬼八月丙戌括所在荒田無  
主名者令放良漏籍等戶屯田庚寅奉使安南國梁曾  
陳孚以安南使人陶子奇梁文藻偕來敕福建行省放  
瓜哇出征軍歸其家甲午辰星犯太微西垣上將戊戌

給安西王府斷事官印甲辰太陰犯畢丁未湖廣行省  
臣言海南海北多曠土可立屯田詔設鎮守黎蠻海北  
海南屯田萬戶府以董之戊申太陰犯鬼營田提舉司  
所轄屯田百七十七頃為水所沒免其租四千七百七  
十二石九月癸丑朔大駕至上都戊午敕各路達魯  
噶齊總管董驛事己未明安岱爾率軍萬人征土番近  
遣使來言乞引茂州先附寨官赴闕不允己丑立海北  
海南博易提舉司稅依市舶司例丙寅遣金齒人還歸

丁卯太陰犯畢癸酉敕以御史臺贓罰鈔五萬錠給衛士之貧者辛巳登州蝗恩州水百姓缺食賑以義倉米五千九百餘石冬十月癸未朔以待衛親軍千戶張邦瑞為萬戶佩虎符將六盤山軍千人及皇子西平王等軍共為萬人西征賜冠城疏河董役軍官衣各一襲賜交趾陶子奇等十七人冬衣荆南安置戊子詔修汴堤己丑遣兵部侍郎哈喇托輝等使克呼格爾納塔星哈喇特納三國仍賜星哈喇特納酋長三珠虎符庚寅饗

於太廟彗星入紫微垣抵斗魁光芒尺許凡一月乃滅  
丙申熒惑犯亢己亥太陰犯天關辛丑太陰犯井壬寅  
敕減米直糶京師饑民其鰥寡孤獨不能自存者給之  
甲辰赦天下戊申僧官總統以下有妻者罷之以段貞  
董開河修倉之役加平章政事庚戌造象蹄掌甲辛亥  
禁江南州郡以乞養良家子轉相販鬻及強將平民略  
賣者平灤水免田租萬一千九百七十七石廣濟署水  
損屯田百六十五頃免田租六千二百一十三石十一

月壬子朔改德安府隸黃州路丁巳孫民獻嘗附僧格  
助約蘇穆爾為惡同知上都留守司事又受贓減諸從  
臣糧詔籍其家貲妻奴復因潭州呂澤訴其刻虐械送  
民獻至湖廣如澤所訴窮治之立海北海南道肅政廉  
訪司治雷州庚申敕中書省凡出征軍母以和顧和買  
煩其家乙丑太陰犯畢丁卯太陰犯井戊辰以金齒木  
朶甸戶口增立下路總管府給為長者雙珠虎符真定  
路達魯噶齊哈克織言廉訪司官檢責民官太苛乞以

民官復檢責廉訪司文卷從之庚午太陰犯鬼兔江南  
都作院軍匠出征丙子熒惑犯鈞鈴戊寅歲星犯亢巳  
卯河南河北行省平章巴延入為中書省平章政事位  
特爾格琳沁博果密上十二月丁亥禁漢軍更番者毋  
帶軍器辛卯武平路達嚕噶齊塔海言女直地至今未  
定賊一入境百姓離散臣願往安集之詔以塔海為遼  
東道宣慰使壬辰中書左丞馬紹疾以詹事丞張九思  
代之乙未太陰犯井遣使督思播二州及鎮遠黃平發

宋舊軍八千人從征安南庚子平章政事伊克穆蘇史  
弼高興等無功而還各杖而恥之沒家貲三之一癸卯  
敕以僧格沒入官田三百九十一頃八十餘畝給額爾  
克鄂蘭所司匠戶丙午以塔齊托克托穆爾耀珠巴延  
四人並安西王傳是歲天下路府州縣等二千三十八  
路一百六十九府四十三州三百九十八縣千一百六  
十五宣撫司十五安撫司一寨十一鎮撫所一堡一各  
甸部管軍民官七十三長官司五十一錄事司百三巡



院三官府大小二千七百三十三處隨朝二百二十一員萬六千四百二十五隨朝千六百八十四戶一千四百萬二千七百六十賜皇后親王公主如歲例賜諸臣羊馬價鈔四十三萬四千五百錠幣五萬五千四百一十疋周貧乏鈔三萬七千五百二十錠作佛事祈福五十一真定寧晉等處被水旱蝗雹為災者二十九斷死罪四十

三十一年春正月壬子朔帝不豫免朝賀癸亥知樞密

院事已延至自軍中庚午帝大漸癸酉帝崩于紫檀殿  
在位三十五年壽八十親王諸大臣發使告哀于皇孫  
乙亥靈駕發引葬起輦谷從諸帝陵夏四月皇孫至上  
都甲午即皇帝位丙午中書右丞相鄂勒哲及文武百  
官議上尊諡壬寅為壇于都城南七里甲辰遣司徒鄂  
都岱平章政事博果密左丞張九思率百官請諡于南  
郊五月戊午遣攝太尉臣鄂都岱奉冊上尊諡曰聖德  
神功文武皇帝廟號世祖國語尊稱曰色辰皇帝是日

鄂勒哲等議同上先皇后鴻吉哩氏尊諡曰昭睿順聖  
皇后世祖度量弘廣知人善任使信用儒術用能統一  
海寓立經陳紀所以為一代之制者規模宏遠矣

元史卷十七

元史卷十七考證

世祖本紀至元二十九年二月詔禁鞭背案元典章  
鞭背之禁因是年民人劉阿韓告其子劉蹠杖背十  
七致斃行御史臺上其事故有是令

三十年正月乙丑敕福建毋進鶻戍和林漢軍四百留  
百人案原本戍字上有戍字則以戍戍為干支下  
文丙寅日正與乙丑二日相連中間不應有戍戍疑  
是衍文細繹之所謂漢軍蓋戍和林者原本因戍與

戊相近而訛復于其上妄增戊字作為干支一誤再  
誤相沿不察耳今改正

欽定四庫全書薈要卷六千三百九十七史部

元史卷十八

明翰林學士亞中大夫知制誥兼修國史宋濂等修

本紀第十八

成宗一

成宗欽明廣孝皇帝諱特穆爾世祖之孫裕宗珍戩第三子也母曰徽仁裕聖皇后鴻吉哩氏至元二年九月庚子生二十四年諸王納延反世祖自將討平之其後

哈坦復叛命帝往征之哈坦敗亡三十年乙巳受皇太子寶撫軍於北邊三十一年春正月世祖崩親王諸大臣遣使告哀軍中夏四月壬午帝至上都左右部諸王畢會先是御史中丞崔彧得玉璽于故臣之家其文曰受命于天既壽永昌上之徽仁裕聖皇后至是手授於帝甲午即皇帝位受諸王宗親文武百官朝於大安閣詔曰朕惟太祖聖武皇帝受天明命肇造區夏聖聖相承光熙前緒迨我先皇帝體元居正以來然後典章文



物大備臨御三十五年薄海內外罔不臣屬宏規遠略  
厚澤深仁有以衍皇元萬世無疆之祚我昭考早正儲  
位德盛功隆天不假年四海缺望顧惟眇質仰荷先皇  
帝殊眷往歲之夏親授皇太子寶付以撫軍之任今春  
宮車遠馭奄棄臣民乃有宗藩昆弟之賢戚畹官僚之  
舊謂祖訓不可以違神器不可以曠體承先皇帝夙昔  
付託之意合辭推戴誠切意堅朕勉徇所請於四月十  
四日即皇帝位可大赦天下尚念先朝庶政悉有成規

惟慎奉行罔敢失墜更賴宗親勲戚左右忠良各盡乃  
誠以輔台德布告遠邇咸使聞知詔除大都上都兩路  
差稅一年其餘減丁地稅糧十分之三係官逋欠一切  
蠲免民戶逃亡者差稅皆除之追尊皇考曰皇帝尊太  
母元妃曰皇太后庚子遣攝太尉鄂都岱等請諡于南  
郊遣禮部侍郎李衍兵部郎中蕭泰登齋詔使安南中  
書省臣言陛下新即大位諸王駙馬賜與宜依往年大  
會之例賜金一者加四為五銀一者加二為三又江南

分土之賦初止驗其版籍令戶出鈔五百文今亦當有  
所加然不宜增賦於民請因五百文加至二貫從今歲  
官給之從之乙巳賜駙馬曼濟岱銀七萬六千五百兩  
奇爾濟蘇一萬五千四百五十兩高麗王王珣三萬兩  
丁未湖廣行省所屬寇盜竊發復令劉國傑討之戊申  
太白晝見又犯鬼詔存恤征黎蠻瓜哇等軍己酉雲南  
行省以所定路府州縣來上上路二下路十一下州四  
十九中縣一下縣五十以金齒歸附官阿魯為孟定路

總管佩虎符是月即墨縣電五月庚戌朔太白犯輿鬼

壬子始開醮祠於壽寧宮祭太陽太歲火土等星於司

天臺戊午遣攝太尉鄂都岱奉玉冊玉寶上大行皇帝

尊諡曰聖德神功文武皇帝廟號世祖皇后尊諡曰昭

睿順聖皇后皇考尊諡曰文惠明孝皇帝廟號裕宗賜

國王和通金二百五十兩阿爾婁百五十兩巴延伊徹

察喇各五十兩銀鈔錦各有差庚申祭紫微星於雲仙

臺雲南部長適習四川散毛洞主覃順等來貢方物陞

其洞為府丁卯八番宣慰使烏魯斯犯法為人所訟懼  
罪逃還京師賜安西王阿南達鈔萬錠己巳改皇太后  
所居舊太子府為隆福宮詹事院為徽政院司議曰中  
議府正曰宮正家令曰內宰典醫署曰掌醫典寶曰掌  
謁典設曰掌儀典饈曰掌饈仍增控鶴至三百人詔各  
處轉運司官欺隱姦詐為人所訟者聽廉訪司即時追  
問其案牘仍舊例於歲終檢之陞福建鹽提舉司為鹽  
轉運司增捕私鹽人賞格庚午諸王伊埒布哈來朝以

濟馬輸官官酬其直為鈔十有一萬五千錠賜伊蘇岱爾汪惟和兩軍將士糧五萬石餉北征軍壬申御史臺臣言內外官府增置愈多在京食祿者萬人在外尤衆理宜減併命與中書議之用崔彥言肅政廉訪司案牘勿令總管府檢劾詔議增官吏祿以伊蘇岱爾所統將士貧給鈔萬錠乙亥以札實知樞密院事戊寅封皇姑高麗王王矩妃呼圖克庫哩頁額實為安平公主賜伊都呼金五百五十兩銀七千五百兩哈瑪爾德濟特哩

金五十兩銀四百五十兩西平王鄂囉齊言汪惟和之  
軍多庇其富實而令貧弱者應役命更易之以阿爾婁  
為太師巴延為太傅伊徹察喇為太保禁諸司豪奪鹽  
船遞運官物僧道權勢之家私匿盜販是月密州路諸  
城縣大都路武清縣電峽州路大水六月庚辰朔日有  
食之辛巳御史臺臣言名分之重無踰宰相惟事業顯  
著者可以當之不可輕授廉訪司官歲以五月分按所  
屬次年正月還司職官犯贓敕授者聽總司議宣授者

上聞其本司聲跡不佳者代之受賂者依舊例比諸人加重帝曰其與中書同議乙酉雲南金齒路進馴象三丙戌以雲南歲貢馬二千五百匹給梁王太多命減之庚寅必齊罕布哩頁城甘珠爾丹遣使來貢詔罷功德使司及泉府司官冗員壬辰立晉王內史府復以光祿寺隸宣徽院中書省臣言朝會賜與之外餘鈔止有二十七萬錠凡請錢糧者乞量給之定西平王鄂囉齊寧遠王庫庫楚鎮南王托歡及額森特穆爾大會賞賜例



金各五百兩銀五千兩鈔二千錠幣帛各二百匹諸王  
特穆爾布哈伊奇哩布哈等金各四百兩銀四千兩鈔  
一千六百錠幣帛各一百六十匹以特穆爾復為平章  
政事諸王阿齊格部約蘇卜屢叛伏誅以甘肅等處米  
價踴貴詔禁釀酒命伊徹察喇提調羣牧事乙未以世  
祖皇后裕宗謚號播告天下免所在本年包銀俸鈔及  
內郡地稅江淮以南夏稅之半己亥以乳保勞封完顏  
巴延為冀國公妻何氏冀國夫人鄂勒哲貸民錢多取

其息命依世祖定制辛丑浙西道提刑按察使鴻吉勒  
岱鄂爾和受賂遇赦免復以為河西隴北道肅政廉訪  
使御史臺臣言先朝決獄隨罪輕重笞杖異施今止用  
杖乞如舊制不允宋使家鉉翁安置河間年踰八十賜  
衣服遣還家癸卯封駙馬奇爾濟蘇為唐王給金印甲  
辰詔翰林國史院修世祖實錄以鄂勒哲監修國史乙  
巳給庫齊圖出征軍士鈔各千戶千錠丙午太陰犯井  
以實保齊從征諸軍自備馬一千一百九十餘匹命給

還其直戊申詔宗藩內外官吏人咸聽丞相鄂勒哲約  
束以策凌巴鄂爾嘉勒為帝師賜玉印賜舒蘇德濟公  
主鈔千錠諸王巴爾達噶茂察哈爾部貧乏者三千錠  
伯頁烏珍齊老日巴雅布喇嘛庫齊楞瑪克展各金五  
十兩銀鈔幣有差是月東安州蝗秋七月壬子詔御史  
大夫阿爾婁振臺綱禁內外諸司減官吏俸為宴飲費  
置隆福宮衛候司癸丑詔軍民各隸所司無相侵越乙  
卯以諸王徹伯爾部四百餘戶乏食徙其家屬就食內

郡仍賜以鄂囉軍年例鈔三千錠給瓜沙之民徙甘州  
屯田者牛價鈔二千六百錠以頁特密實為東昌路達  
魯噶齊中書省臣言其嘗官是郡犯法五百餘款今不  
宜復官帝曰姑試之己未復立平陽路之蒲武鄉保定  
路之博野泰安州之新泰等縣賜諸王徹伯爾鄂囉軍  
伊蘇岱爾紅襖軍帛各六萬疋庚申改侍衛都指揮使  
司為隆福宮左都威衛使右都威衛使以陝西道廉訪  
司沒入贓罰錢舊給安西王者令行省別貯之壬戌詔

中外崇奉孔子癸亥罷肇州宣慰司併入遼東道戊辰  
減八番等處所設官二百一十六員八番稱新附九十  
萬戶設官四百二十四員及遣官覈實止十六萬五千  
餘戶故減之行樞密院頁特密實程鵬飛各加平章政  
事中書省臣言樞密之臣不宜重與相銜帝命以軍職  
尊崇者授之辛未中書省臣言向御史臺劾右丞阿里  
嘗與阿哈瑪特同惡論罪抵死幸得原免不當任以執  
政臣謂阿里得罪後能自警省乞令執政如故從之以

軍戶所棄田產歲入及管軍官吏贖罪等鈔復輸樞密

院癸酉以陝西行省平章博果密為中書平章政事甲

戌立隨路民匠打捕鷹房納綿等戶總管府秩正三品

詔招諭暹國王甘珠爾丹來朝有故則令其子弟及陪

臣入質扎爾古齊言諸王之下有罪者不聞于朝輒自

決遣詔禁治之詔阿爾婁守北邊賜其所統軍士幣帛

各萬疋及西征軍士幣三萬疋鈔三萬六千六百錠賜

布拉噶沁公主及諸王阿濟格女弟巴圖銀鈔有差是

月棣州陽信縣雹大風拔木發屋真定路之南宮新河  
易州之涑水等縣雹八月庚辰太白晝見癸未平灤路  
遷安等縣水蠲其田租戊子初祀社稷用堂上樂歲以  
為常己丑以大都留守段貞平章政事范文虎監浚通  
惠河給二品銀印令軍士復濬浙西太湖澱山湖溝港  
立新河運糧千戶所詔諸路平準交鈔庫所貯銀九十  
三萬六千九百五十兩除留十九萬二千四百五十兩  
為鈔母餘悉運至京師復立平陽之芮城陵川等縣辛

卯以孟克薩喇妻子為敵所掠賜鈔八千錠戊戌太陰  
犯畢太白犯軒轅是月德州之安德縣大風雨雹九月  
壬子聖誕節帝駐驛三部落受諸王百官賀癸丑詔有  
司存恤征瓜哇軍士死事之家甲寅口授諸王傅昂哈  
布哈為丞相丁巳太白經天庚申以和囉羅及納延之  
黨七百餘人隸同知樞密院事布琳濟達習水戰丙寅  
太陰掩填星辛未太陰犯軒轅乙亥太白犯右執法太  
陰犯平道遣托海特穆爾等使克埒格爾趙州之寧晉



等縣水冬十月戊寅車駕還大都辛巳江浙行省臣言  
陛下即位之初詔蠲今歲田租十分之三然江南與江  
北異貧者佃富人之田歲輸其租今所蠲特及田主其  
佃民輸租如故則是恩及富室而不被於貧民也宜令  
佃民當輸田主者亦如所蠲之數從之遼陽行省所屬  
九處大水民饑或起為盜賊命賑恤之江西行省臣言  
銀場歲辦萬一千兩而未嘗及數民不能堪命自今從  
實辦之不為額壬午太白犯左執法有事于太廟癸巳

太陰掩填星乙未太陰犯井金齒新附孟愛甸首長遣  
其子來朝即其地立軍民總管府朱清張瑄從海道歲  
運糧百萬石以京畿所儲充足詔止運三十萬石辛丑  
帝諭右丞阿里參政梁德珪曰中書職務卿等皆懷怠  
心朕在上都令還頁特密實已沒財產任莽賚布哈皆  
至今未行又不約束吏曹使選人留滯僧格雖姦邪然  
僚屬憚其威政事無不立決卿等其約束曹屬有不事  
事者答之仍以朕意諭丞相鄂勒哲壬寅緬國遣使貢

馴象十乙巳遣南巫里速木答刺繼沒刺牙毳陽使者  
各還其國賜以二珠虎符及金銀符金幣衣服有差初  
伊克穆蘇征瓜哇時嘗招其瀕海諸國於是南巫里等  
遣人來附以禁商泛海留京師至是弛商禁故皆遣之  
十一月丁未朔帝朝皇太后于隆福宮上玉冊玉寶庚  
戌行樞密院臣劉國傑討辰州賊詔選州民刀弩手助  
其軍他不為例京師犯賊罪者三百人帝命事無疑者  
准世祖所定十三等例決之己酉太陰犯亢庚戌廣西

鹽先給引於民而徵其直私鹽日橫及官自鬻鹽民復不售詔先以鹽與民而後徵之辛亥中書省臣言國賦歲有常數先帝嘗曰凡賜與雖有朕命中書其斟酌之由是歲務節約常有贏餘今諸王藩戚費耗繁重餘鈔止一百十六萬二千餘錠上都隆興西京應昌甘肅等處糴糧鈔計用二十餘萬錠諸王五戶絲造作顏料鈔計用十餘萬錠而來會諸王尚多恐無以給乞俟其還部臣等酌量定擬以聞從之壬子詔以軍民不相統壹

罷湖廣江西行樞密院併入行省乙卯令河西僧人依  
舊助役丁巳以巴延徹爾參議中書省事其兄巴延言  
曰臣叨平章政事兄弟宜相嫌避帝曰卿勿復言兄平  
章於上弟參議於下何所嫌也罷桂齊屯田總管府罷  
宣政院所刻河西藏經板庚申太陰犯畢甲子詔禁作  
姦犯科者以湖南道宣慰司何偉為中書參知政事罷  
海北海南市舶提舉司壬申立覆實司濟寧路立諸色  
戶計諸總管府秩四品癸酉太白犯房詔改明年為元

貞元年十二月辛巳賜諸王伊斯瑪音金五十兩癸未  
歲星犯房丙戌罷遼河等處人匠正副達嚕噶齊丁亥  
歲星犯鈞鈴甲午以諸王鴻和爾駙馬阿實克等在軍  
加賜金銀鞍勒弓矢衣服有差乙未以巴雅爾台呼喇  
珠所隸一千戶饑賜鈔萬錠壬辰太陰犯鬼戌戌禁侵  
擾農桑者庚子太陰犯房又犯歲星選各衛精兵千人  
命巴喇罕岱爾等將之戌和琳聽太師阿爾婁節度三  
年而更用帝師奏釋京師大辟三十人杖以下百人賜

諸鰥寡貧民鈔二百錠曲靜澂江普安等路夷官各以  
方物來貢以東勝等處牛遞戶貧乏賜鈔三千餘錠卜  
阿里使麻八兒還都阿克蘇民為海都所虜賜鈔三萬  
九千九百錠是月以常德岳鄂漢陽四州水免其田租  
是歲斷大辟三十一人

元貞元年春正月戊申諸王阿實罕來朝賜金五十兩  
銀四百五十兩癸丑以太僕卿濟爾噶朗為御史大夫  
甲寅以從世祖狩杭愛功賜諸王呼喇珠金五十兩珠

一串乙卯太陰犯填星又犯畢壬戌以國忌即大聖壽

萬安寺飯僧七萬癸亥安西王阿南達寧遠王庫庫楚  
皆言所部貧乏賜安西王鈔二十萬錠寧遠王六萬錠  
又以隕霜殺禾復賑安西王山後民米一萬石詔道家  
復行金錄科範以雲南行省左丞楊炎龍為中書左丞  
乙丑以亦奚不薛復隸雲南行省以行樞密院既罷賜  
行中書省長官虎符領其軍庚午以江淞行省平章阿  
喇卜丹為叅知政事壬申立北庭都元帥府以平章政



事赫伯為都元帥江淞行省右丞色埒默為副都元帥  
皆佩虎符立察遜塔拉都元帥府以根敦扎卜為都元  
帥佩虎符饒州路達嚕噶齊阿勒呼木治中趙良不法  
僉江東廉訪司事實保季讓受金縱之事覺實保自殺  
杖季讓除名沒財產奴婢之半罷瓜沙等州屯田癸酉  
歲星犯東咸甲戌有飛書妄言朱清張瑄有異圖者詔  
中外慰勉之乙亥追封皇國舅昂吉諾延為濟寧王謚  
忠武封皇姑囊嘉特章公主為魯國大長公主駙馬曼

濟岱為濟寧王賜金印詔飭諸道鹽運司二月丙子朔  
安西王相塔齊等請復立王相府不許令陝西省臣給  
其所需仍以廉訪司沒入贓罰鈔與之丁丑翰林學士  
承旨留夢炎告老帝以其在先朝言無所隱厚賜遣之  
命赫伯色埒默博囉將特默齊軍萬人出征聽諸王徹  
伯爾節度壬午罷江南茶稅以其數三千錠添入江西  
權茶都轉運司歲額詔貸鄂拓克錢逃隱者罪之以其  
錢賞首告者癸未熒惑犯太陰丁亥雲南行省平章額

森布哈言敢麻魯有兩夷未附金齒亦叛服不常乞調  
兵六千鎮撫金齒置驛入緬從之復以拱衛司為正三  
品以濟寧王曼濟岱所部鴻吉哩人貧乏賜鈔一十八  
萬錠戊子思州田哈喇布哈雲南夷卜木四川洞主查  
閣王金齒帶梅混冬等來見緬國阿刺扎高微班的來  
獻舍利寶玩甲午以特默齊軍出征馬不足詔除軍民  
官吏所乘凡有馬者盡括之壬辰太陰犯平道丁酉車  
駕幸上都癸卯太陰犯歲星以諸王琳沁部馬牛驛人

貧乏賜鈔千錠以工部尚書兼諸路金玉人匠總管府  
達魯噶齊呂天麟為中書叅知政事立雲州銀場都提  
舉司秩四品中書省臣言近者阿哈瑪特僧格怙勢賣  
官不別能否止憑解由選調故選法大壞宜令廉訪司  
體覆以聞省臺選官覈實定其殿最以明黜陟其廉訪  
司官亦令省臺同選為宜從之罷河西軍聽各還其所  
屬賜駙馬諾海鈔萬五千錠以醮延春閣賜天師張與  
棟宗師張留孫真人張志僊等十三人玉圭各一製寶

玉五方佛冠賜帝師三月乙巳朔安南世子陳日燭遣使上表慰國哀又上書謝寬賞恩并獻方物丙午遣摩琳璋以鈔五萬錠授征西元帥令市馬萬匹分賜二十四城貧乏軍校庚戌太陰犯填星壬子禁來朝官斂所屬俸丙辰給阿爾婁托克托軍炒米萬石金齒洞蠻來見賜衣遣之戊午罷福建銀場提舉司其歲額銀以有司領之中書省臣言樞密院御史臺例應奏舉官屬其餘諸司不宜奏請今皆請之非便詔自今以後專令中

書擬奏以東作方殷罷諸不急營造惟帝師塔及張法師宮不罷壬戌地震太陰犯房丙寅國王和通隱所賜本部貧民鈔三百五十錠命臺臣遣人按問以愧之詔免醫工門徭增置蒙古學正以各道肅政廉訪司領之夏四月辛巳妖人蒙蟲僭擬及其黨十三人伏誅賜章河至苦鹽貧乏驛戶鈔一萬二千九百餘錠丙戌諸王伊奇哩以兵五千人戍俄羅斯界遣使來求馬帝不允庚寅太陰犯東咸封乳母楊氏為趙國安翼夫人癸巳

以同知烏撒烏蒙等處宣慰司事雅克諾木假兵部尚書佩虎符使馬答兒的陰戊戌給扈從特默齊軍市馬鈔二十萬錠庚子立掌謁司掌皇太后寶秩四品以宦者為之賜桂齊親軍貧戶鈔四萬一千五百餘錠癸卯以諸王徹伯爾所統特默齊紅襖軍各千人隸西平王鄂囉齊設各路陰陽教授仍禁陰陽人不得游於諸王駙馬之門以桂齊萬戶呼圖克布哈等所部為敵所掠賜鈔有差是月真定路平山靈壽等縣有蟲食桑閏四

月丙午為皇太后建佛寺於五臺山以前工部尚書厲  
濟為將作院使領工部事燕南河北道肅政廉訪使宋  
德柔為工部尚書董其役以大都保定真定平陽太原  
大同河間大名順德廣平十路應其所需癸丑歲星犯  
房甲寅太陰犯平道立舍哩招討使司以塔爾古岱為  
使佩虎符乙卯太陰犯亢丁巳太陰掩房己未罷打捕  
鷹房總管府及司籍周用薄斂等庫及徽州路銀場各  
處鹽使司鹽場改設司令司丞仍免大都今歲田租弛



甘州酒禁庚申河南行省虧兩淮歲辦鹽十萬引鈔五  
千錠遣扎拉台等往鞫實命各隨其罪之輕重治之陝  
西行省增羨鹽鈔一萬二千五百餘錠山東都轉運使  
司博碩噶等增羨鹽鈔四千餘錠各賜衣以旌其能南  
人洪幼學上封事妄言五運筭而遣之壬戌塔奇呼阿  
薩爾以不法伏誅詔禁行省行泉府司抽分市舶貨固  
匿其珍細者戊辰遣阿雅噶齊覈實高麗國儲糧平陽  
民訴諸王錫錫奇爾薩巴部曲恣橫遣官鞫之賜安南

國王陳益稷鈔千錠是月蘭州上下三百餘里河清三日五月戊寅以魯國大長公主建佛寺于應昌給鈔千錠金五十兩命敏珠爾丹何榮祖等釐正選法己卯竄莽果部必舒于江西從頁特密實討賊庚辰詔各省止存儒學提舉司一餘悉罷之陞江浙平陽等縣為州以戶為差戶至四萬五萬者為下州五萬至十萬者為中州下州官五員中州六員凡為中州者二十八下州者十五又以戶不及額降連州路為連州增重挑補鈔人

罪告者仍優其賞令犯人給之辛巳罷行大司農司加  
平章政事敏珠爾丹為平章軍國重事中書左丞議中  
書省事何榮祖為昭文館大學士與中書省事甲申詔  
自元貞元年五月以前逋欠錢糧者皆罷徵丁亥太陰  
犯南斗甲午以諸王阿齊格部貧乏賜鈔二十萬錠江  
湖行省臣特穆爾不聽詔遣官責之丙申以巴延子滿  
達勒為僉書樞密院事太后言其父盡心王室欲令代  
其父官帝以其年尚小故有是命詔以農桑水利諭中

外鞏昌府金州西和州會州雨雹無麥禾饒州鎮江常

州湖州平江建康太平常德澧州皆水六月戊申濟南

路之歷城縣大清水溢壞民居壬子高麗王王昫乞

為太師中書令不允以近邊役煩及水災免咸平府民

八百戶今年賦稅詔遼陽省進海東青鷓二十四驛每

驛給牛六頭使者食米五石鷹食羊五口又狗遞十二

驛每戶給鈔十錠甲寅翰林承旨董文用等進世祖實

錄乙卯江西行省所轄郡大水無禾民乏食令有司與

廉訪司官賑之仍弛江河湖泊之禁聽民採取陞沅州  
為路以靖州隸之遣使與各省官就遷調邊遠六品以  
下官併左右兩江宣慰司都元帥府宣撫司為廣西兩  
江道宣慰司都元帥府以靖江為治所仍分司邕州敕  
凡上封事者命中書省發緘視之後以聞詔河西僧納  
租稅癸亥立蒙古軍都元帥府于西川徑隸樞密院以  
阿拉克特穆爾雅爾哈並為都元帥佩虎符河西隴北  
道廉訪司鞫張萬戶不法西平王鄂囉齊沮撓其事帝

命諭之甲子以安西王所部出征軍妻孥乏食給糧二

千石昭賀藤邕澧全衡柳吉贛南安等處蠻寇竊發以

軍民官備禦不嚴撫字不至皆責而降之駙馬濟寧王

曼濟岱私殺罪人御史臺臣言其專擅有旨諭曼濟岱

令知之庚午立西域衛親軍都指揮使司以穆爾德濟

為都指揮使是月汴梁路蝗利州蓋州螟泰安曹州濟

寧路水鞏昌環州慶陽延安安西旱秋七月乙亥徙甘

涼御匠五百餘戶于襄陽詔江南地稅輸鈔丁丑太陰

犯宄罷追問已原逋欠布延徹爾額實公主等俱以其部貧乏來告賜鈔計四十九萬餘錠御史臺臣言內地盜賊竊發者衆皆由國家赦宥所致乞命中書立為條格督責所屬期至盡滅制曰可乙卯詔申飭中外有儒吏兼通者各路舉之廉訪司每道歲貢二人省臺委官立法考試中程者用之所貢不公罪其舉者職官坐贓論斷再犯者加二等倉庫官吏盜所守錢糧一貫以下笞之至十貫杖之二十貫加一等一百二十貫徒一年

每三十貫加半年二百四十貫徒三年滿三百貫者死  
計贓以至元鈔為則給江南行御史臺守護軍百人減  
海南屯田軍之半還其元翼詔增給諸軍藥餌價直壬  
午立肇州屯田萬戶府以遼陽行省左丞阿薩爾領之  
甲申歲星犯房給塞下貧民鈔二萬四千錠己丑賜劉  
國傑玉帶錦衣旌其戰功辛卯以托克托呼所部貧賜  
鈔十萬錠戊戌朱永福邊珍裕以妖言伏誅扎爾古齊  
文移舊用國語敕改從漢字壬寅詔易江南諸路天慶



觀為玄妙觀毀所奉宋太祖神主大都遼東東平常德  
湖州武衛屯田大水隆興路電太原平陽安豐河間等  
路旱八月乙酉太陰犯牛壬子太陰犯壘壁陣辛酉緬  
國進馴象三癸亥賑遼陽民被水者糧兩月己巳以駙  
馬諾海知樞密院事金復州屯田有蟲食禾汴梁安西  
真定等路旱平江安豐等路大水九月甲戌帝至自上  
都乙亥用帝師奏釋大辟三人杖以下四十七人戊寅  
以巴咱爾治私第給鹽萬引詔輸米十萬石于權場故

廩以備北塞以特默齊軍士所至擾民令赫伯鎮之犯者罪其主將乙卯罷四川淘金戶四千還其元籍罪初獻言者庚辰罷寧夏路行中書省以其事併入甘肅行省丁亥瓜哇遣使來獻方物己丑給桓州甲匠糧千石壬辰湖州司獄郭玘訴澠西廉訪司僉事張孝思多取廩餼孝思繫玘于獄行臺令監察御史楊仁往鞠而江澠行省平章特穆爾達孝思至省訊問又令其屬官與仁同鞠玘事仁不從行臺以聞詔省臺遣官鞠問既引

服皆杖之諸王錫錫部衆擾民遣官按問杖其所犯重者餘聽錫錫責之甲午太陰犯軒轅戊戌太陰犯平道宣德府大水軍民乏食給糧兩月武衛萬盈屯及延安路隕霜殺禾高郵府泗州賀州旱平江廬州等路大水冬十月癸卯有事于太廟中書省臣言去歲世祖皇后裕宗祔廟以綾代玉冊今玉冊玉寶成請納諸各室帝曰親享之禮祖宗未嘗行之其奉冊以來朕躬祝之命獻官迎導入廟給江淞河南巡邏私鹽南軍兵仗癸丑

以西北叛王將入自土蕃命平章軍國重事達實密往  
征之仍敕便宜總帥發兵千人從行聽其節度甲寅中  
書省御史臺臣言江淞行省平章莽賚布哈陳臺憲非  
便事臣等議乞自今監察御史廉訪司有所按覈州縣  
官與本路同鞠路官與宣慰司同鞠宣慰司官與行省  
同鞠制曰可詔諸王駙馬部民既隸軍籍者毋奪回本  
部己未賜各衛士貧乏者鈔二萬九千三百餘錠辛酉  
辰星犯房壬戌辰星犯鍵閉癸亥賜諸王巴咱爾哈喇

哈達蘇都爾三部鈔四萬八千五百餘錠丁卯以博囉

齊達喇齊等貧乏賜鈔二萬九千餘錠戊辰太白晝見  
太陰犯房遣安南朝貢使陳利用等還其國降詔諭陳  
日燭十一月甲戌太白經天及犯壘壁陣辛巳置江淞  
行省檢校官二員立江淞金銀洞冶轉運使司乙酉太  
陰犯井丙戌毳陽酋長之兄脫杭捧于法而刺酋長之  
弟密刺八都阿魯酋長之弟脫杭忽先等各奉金表來  
覲丁亥太陰犯鬼戊子賜阿魯酋長虎符癸巳賜安西

王甲冑槍槌弓矢橐鞬等十五萬八千二百餘事戊戌  
陞贛州路之寧都會昌二縣為州以石城縣隸寧都瑞  
金縣隸會昌詔江淞行省括隱漏官田及檢劾富强避  
後之戶十二月庚子朔遣集賢院使諤爾根薩里等祭  
星于司天臺癸卯以駙馬阿布哈所部民貧賜鈔萬錠  
賜諸王伊克圖呼喇珠阿實罕等金各二百五十兩鈔  
五百錠丙辰太陰犯軒轅荆南僧普昭等偽撰佛書有  
不道語伏誅己未詔大都路凡和顧和買及一切差役

以諸色戶與民均當賜諸王巴延特穆爾阿巴額布根  
金各五百兩銀五千兩鈔二千錠幣帛各二百疋其幼  
王減五分之一以各道廉訪司官八員員一印命收其  
三甲子太陰犯天江賜帝師雙龍鈕玉印伊蘇岱爾之  
軍因李璫亂去山東其元駐之地為人所墾歲久成業  
爭訟不已命別以境內荒田給之正軍五頃餘丁二頃  
已滿數者不給減海運腳價鈔一貫計每石六貫五百  
文著為令徙縉山所居奇爾吉斯等民于山東以田與

牛種給之丁卯禁諸王輒召有司官吏已已詔免軍器  
匠門徭是歲斷大辟三十人

元史卷十八



元史卷十八考證

成宗本紀元貞元年二月壬辰太陰犯平道甲午以特  
點齊軍出征馬不足詔除軍民官吏所乘凡有馬者  
盡括之 案原本甲午在壬辰之上考之天文志太  
陰犯平道亦在壬辰日据改

五月庚辰陞江浙平陽等縣為州 案地理志平陽瑞  
安二縣屬温州元貞元年升州原本訛江南据改



欽定四庫全書薈要卷六千三百九十八史部

元史卷十九

明翰林學士亞中大夫知制誥兼修國史宋濂等修

本紀第十九

成宗二

二年春正月丙子詔蠲兩都站戶和顧和市己卯詔江南毋捕天鷲以呼喇珠千戶所部屯夫貧乏免其所輸租上思州叛賊黃勝許攻剽水口思光寨湖廣行省調

兵擊破之獲其黨黃法安等賊遁入上牙六羅壬午太  
陰犯輿鬼詔凡戶隸桂齊者諸人毋爭甲申命西平王  
鄂囉齊今夏居上都丙戌太白晝見安西王傅塔奇勒  
圖特穆爾等復請立王相府帝曰去歲阿南達嘗面陳  
朕以世祖定制諭之今復奏請豈欲以四川京兆悉為  
彼有耶賦稅軍站皆朝廷所司今姑從汝請置王相府  
惟行王傅事丁亥太陰犯平道己丑御史臺臣言漢人  
為同寮者嘗為姦人捃摭其罪由是不敢盡言請於近

侍實保齊舒庫爾齊中擇人用之帝曰安用此曹其選  
漢人識達事體者為之以御史中丞圖沁為御史大夫  
庚寅太陰犯鈎鈴辛卯令御史察喇伊克及哈喇齊所  
部衛士自運軍糧給其行費甲午授嗣漢三十八代天  
師張與材太素凝神廣道真人管領江南諸路道教乙  
未詔諸王公主駙馬非奉旨毋罪官吏賜諸王赫伯妃  
鈔千二百錠幣帛千疋駙馬塔爾海特穆爾鈔三千錠  
回紇布爾罕獻獅豹藥物賜鈔千三百餘錠二月乙亥

朔中書省臣言陛下自御極以來所賜諸王公主駙馬  
勲臣為數不輕向之所儲散之殆盡今繼請者尚多臣  
等乞甄別貧匱及赴邊者賜之其餘宜悉止從之分江  
浙行省臣萬人戍湖廣給青海屯田軍農具詔奉使及  
軍官歿而子弟未襲職者其所佩金銀符歸于官違者  
罪之辛丑立中御府以托和巴唐古並為中御卿丙午  
禁軍將擅易侍衛軍蒙古軍以家奴代役者罪之仍令  
其奴別入兵籍以其主資產之半畀之軍將敢有縱之

者罷其職括蒙古戶漸丁以充行伍丁未太陰犯井庚  
戌詔軍卒擅更代及逃歸者死給托克托呼所部屯田  
農器丙辰詔江南道士貿易田者輸田商稅庚申命扎  
拉爾呼圖克所部戶居奉聖雲州者與民均供徭役自  
六盤山至黃河立屯田置軍萬人丙寅以大都留守司  
達魯噶齊段貞為中書平章政事遣使代祀嶽瀆賜安  
西王米三千石以賑饑民三月壬申以中書平章政事  
博果密為昭文館大學士平章軍國事罷太原平陽路

釀進蒲萄酒其蒲萄園民侍為業者還之諸王徹伯爾  
言所部特默齊軍懦弱者三千餘人乞代以強壯從之  
仍命徹伯爾非奉旨毋擅徵發以齊喇拉駐夏民饑給  
糧六月郡王慶通有疾以其子伊埒布哈代之賜巴咱  
爾哈喇哈達蘇都爾三人鈔各千錠治書侍御史烏遜  
受贓命御史臺與宣政院使達實密雜治之癸酉增駐  
夏軍為四萬人實都言晉王噶瑪拉多羅岱言阿爾婁  
皆有異圖詔樞院鞠之無驗帝命言晉王者死而言阿



爾婁者謫從軍自效詔雲南行臺檢劾亦乞不薛宣慰  
司案牘甲戌遣諸王伊奇哩班布爾實琳沁雅爾堅昂  
吉爾岱並駐夏于晉王齊喇拉之地丙子車駕幸上都  
丁丑以完顏邦義納蘇台劉季安妄議朝政杖之徒二  
年籍其家財之半甲申次大口乙酉太陰犯鈞鈐辛卯  
賜遼陽行省糧三萬石壬辰詔駙馬伊都呼括流散輝  
和爾戶癸巳湖廣行省以叛賊黃勝許黨魯萬丑王獻  
于京師賜諸王特穆爾金二百五十兩銀二千五百兩

鈔五千錠以旌其戰功以赫伯及塔塔喇所部民饑賑米各千石夏四月己亥朔命薩題勒密實招集其祖孟古岱所部流散人戶賜諸王班布爾實鈔四萬錠伊津六萬錠平陽之絳州台州路之黃巖州饑杭州火並賑之五月戊辰朔免兩都徭役辛未安西王遣使來告貧乏帝語之曰世祖以分賚之難嘗有聖訓阿南達亦知之矣若言貧乏豈獨汝耶去歲賜鈔二十萬錠又給以糧今與則諸王以為不均不與則汝言人多饑死其給

糧萬石擇貧者賑之甲戌詔民間馬牛羊百取其一羊  
不滿百者亦取之惟色目人及數乃取丁丑太陰犯平  
道庚辰土番叛殺掠階州軍民遣托克托會諸王特穆  
爾布哈哲呼等兵討之甲申命伊津色徹肯駐夏于和  
約爾之地禁諸王公主駙馬招戶己丑詔諸徒役者限  
一年釋之母杖庚寅罷四川馬湖進獨本葱詔諸王駙  
馬及有分地功臣戶居上都大都隆興者與民均納供  
需丁酉命諸行省非奉旨毋擅調軍安南國遣人招誘

叛賊黃勝許伊克穆蘇進紫檀賜鈔四千錠是月野蠶成繭河中府之猗氏電太原之平晉獻州之交河樂壽莫州之莫亭任邱及湖南醴陵州皆水濟寧之濟州螟六月己亥給徹伯爾軍馬七千二百餘匹詔晉王所部凡糧以歲給衣則三年賜之給瓜州沙州站戶牛種田具御史臺臣言官吏受賂初既辭伏繼以審覈而有司徇情致令異辭者乞加等論罪從之乙巳太白犯天關以調兵妨農免廣西容州等處田租一年丙午叛賊黃

勝許遁入交趾甲寅降官吏受贓條格凡十有三等丁巳太白犯填星癸亥太陰犯井丙寅詔行省行臺凡朱清有所陳列毋輒止之賜西平王鄂囉齊銀二百五十兩鈔六千錠所部鈔六萬錠諸王琳沁所部二十萬錠俄羅斯駐冬軍三萬錠是月大都真定保定太平常州鎮江紹興建康澧州岳州廬州汝寧龍陽州漢陽濟寧東平大名滑州德州蝗大同隆興順德太原電海南民饑發粟賑之秋七月庚午肇州萬戶府立屯田給農具

種食辛未以鈔十一萬八千錠給西番諸驛甘肅兩州驛戶饑給糧有差賜諸王鄂勒哲印癸酉詔茶鹽轉運司印鈔提舉司運糧漕運司官仍舊以三年為代雲南福建官吏滿任者給驛以歸壬午填星犯井太白犯輿鬼括巴延阿珠阿爾哈雅等所據江南田及權豪匿隱者令輸租河泊官歲入五百錠者敕授增江西河南省參政一員以朱清張瑄為之授特進上柱國高麗王世子王諤為儀同三司領都僉議司事乙酉遣雲南省逃

軍戍亦乞不薛命湖廣江西兩省擇駐夏軍牧地丙戌  
遣伊呼訥等使馬八兒國己丑命行臺監察御史鈞校  
隨省理問所案牘以虎賁三百人戍應昌諸提調錢正  
官其部有逋欠者勿遷敘廣西賊陳飛雷通藍青謝發  
寇昭梧藤容等州湖廣左丞巴特瑪琳沁擊平之辛巳  
賜呼雅克齊戍軍鈔三萬九千餘錠是月平陽大名歸  
德真定蝗彰德真定曹州濱州水懷孟大名河間旱太  
原懷孟電福建廣西兩江道饑賑粟有差八月丁酉朔

禁舶商毋以金銀過海諸使海外國者不得為商庚子  
太陰犯亢太白犯軒轅壬寅命江浙行省以船五十艘  
水工一千三百人沿海巡禁私鹽癸卯太陰犯天江乙  
巳詔諸人告捕盜賊者強盜一名賞鈔五十貫竊盜半  
之應捕者又半之皆徵諸犯人其無可徵者官給乙卯  
太陰犯天街太白犯上將給諸王琳沁軍糧三月是月  
德州彰德太原蝗咸寧縣金復州隆興路隕霜殺禾寧  
海州大雨大名路水九月戊辰太白犯左執法辛未聖



誕節帝駐驛安同泊受諸王百官賀壬申太陰掩南斗  
甲戌增鹽價鈔一引為六十五貫鹽戶造鹽錢為十貫  
獨廣西如故徵浙東福建夏稅湖廣罷民間鹽鐵爐竈  
給襄陽府哈喇婁軍未賜田者糧兩月罷淮西諸巡禁  
打捕人員丁丑太陰犯壘壁陣戊寅元江賊捨資殺掠  
邊境梁王命集賽台等討降之甲申雲南省臣額森布  
哈征乞藍拔瓦農開陽兩寨其黨答利率諸蠻來降乞  
藍悉平以其地為雲遠路軍民總管府己丑太陰犯軒

轅辛卯諸王徹伯爾言汪惟和等軍貧乏帝以其久戍命留五千駐冬餘悉遣還至明年四月赴軍甲午令廣海左右兩江戍軍以二年三年更戍海都烏魯斯布哈部給徹伯爾所部軍米萬石是月常德之沅江縣水免田租河間之莫州獻州旱河決河南杞封邱祥符寧陵襄邑五縣冬十月丁酉有事于太廟壬寅發米十萬石賑糶京師以宣德奉聖懷來縉山等處牧宿衛馬甲辰修大都城壬子車駕至自上都職官坐贓經斷再犯者

加本罪三等贛州賊劉六十攻掠吉州江西行省左丞  
董士選討平之是月廣備屯及海寧之文登水十一月  
丁卯以蠻洞將領彭安國父子討田知州有功賜安國  
金符子為蠻夷官答馬刺一本王遣其子進象十六戊  
辰以廣西戍軍悉隸兩江宣慰司都元帥府己巳鄂都  
岱等進所譯太宗憲宗世祖實錄帝曰呼圖克庫哩頁  
額實非昭睿順聖太后所生何為亦曰公主順聖太后  
崩時裕宗已還自軍中月日先後差錯又巴剌密特砲

手伊斯瑪音泉府司皆小事何足書耶辛未徙江浙行  
省巴圖軍萬人戍潭州潭州以南軍移戍郴州以洪澤  
芍陂屯田軍萬人修大都城遣樞密院官整飭江南諸  
鎮戍軍凡將校勤怠者列實以聞增海運明年糧為六  
十萬石丁丑太陰犯月星又犯天街庚辰太陰犯井丁  
亥太陰犯上相乙酉樞密院臣言江南近邊州縣宜擇  
險要之地合羣戍為一屯率有警急易于徵發詔行省  
圖地形覈軍實以聞戊子太陰犯平道增大都巡防漢

軍壬辰太陰犯天江緬王遣其子僧伽巴叔撒邦巴來  
貢方物罷雲南栢興府入德昌路賜太常禮樂戶鈔五  
千餘錠是月象食屯水免其田租十二月戊戌立徹里  
軍民總管府雲南行省臣言大徹里地與八百媳婦犬  
牙相錯今大徹里胡念已降小徹里復占扼地利多相  
殺掠胡念遣其弟胡倫乞別置一司擇通習蠻夷情狀  
者為之帥招其來附以為進取之地詔復立蒙樣剛等  
甸軍民官癸卯定諸王朝會賜與太祖位金千兩銀七

萬五千兩世祖位金各五百兩銀二萬五千兩餘各有  
差丁未太陰犯井詔諸行省徵補逃亡軍復司天臺觀  
星戶乙卯太陰犯進賢癸亥釋在京囚百人增置侍御  
史二員賜金齒羅斛來朝人衣是月大都保定汴梁江  
陵沔陽淮安水金復州風損禾太原開元河南芍陂旱  
蠲其田租是歲斷大辟二十四人

大德元年春正月庚午詔增諸王永和爾烏魯斯布哈  
歲賜各鈔千錠辛未諸王琳沁來朝薨于道賜幣帛五

百疋乙亥給阿爾婁匠者田人百畝乙酉以邊地乏芻  
給徹伯爾征行馬粟四月丙戌以鈔十二萬錠鹽引三  
萬給甘肅行省實保齊等為叛寇所掠仰食於官賜以  
農具牛種俾耕種自給己丑以永和爾等所部貧乏摘  
和琳漢軍置屯田於五條河以歲入之租資之辛卯以  
張斯立為中書省參知政事諸王阿濟格駐太原河東  
之民困於供億詔詰問之仍歲給鈔三萬錠糧萬石給  
晉王所部屯田農器千具建五福太乙神壇時汴梁歸

德水穆稜等九站饑詔以米六百餘石賑之給昆種田  
戶耕牛二月甲午朔賜晉王噶瑪拉鈔七萬錠安西王  
阿南達三萬錠丙申蒙陽甸酋長納欵遣其弟阿不刺  
等來獻方物且請歲貢銀千兩及置驛傳詔即其地立  
通西軍民府秩正四品戊戌陞全州為全寧府庚子詔  
東部諸王分地蒙古戍軍死者補之不勝役者易之癸  
卯徙揚州萬戶鄧新軍屯蘄黃以實喇台所隸新附高  
麗女直漢軍居瀋州甲申諸軍民相訟者命軍民官同



聽之丁未省打捕鷹房府入東京路戊午羅羅斯酋長  
來朝己未改福建省為福建平海等處行中書省徙治  
泉州平章政事高興言泉州與瑠求相近或招或取易  
得其情故徙之減福建提舉司歲織段三千疋其所織  
者加文繡增其歲輸衲服二百其車渠帶工別立提舉  
司掌之封的立普哇挈阿迪提牙為緬國王且詔之曰  
我國家自祖宗肇造以來萬邦黎獻莫不畏威懷德嚮  
先朝臨御之日爾國使人稟命入覲詔允其請爾乃遽

食前言是以我帥間之臣加兵於彼此者爾遣子信合  
八的奉表來朝宜示含宏特加恩渥今封的立普哇挈  
阿迪提牙為緬國王賜之銀印子信合八的為緬國世  
子錫以虎符仍戒飭雲南等處邊將毋擅興兵甲爾國  
官民各宜安業又賜緬王弟撒邦巴一珠虎符首領阿  
散三珠虎符從者金符及金幣遣之以新附軍三千屯  
田漳州庚申陞寧都會昌縣為州並隸贛州路寧陽鎮  
為縣隸濟寧路隕州巡檢司為河曲縣隸保德州安豐

路設錄事司以行徽政院副使王慶端為中書右丞詔

改元赦天下免上都大都隆興差稅三年給尹濟所部

六千戶糧三月三月戊辰熒惑犯井己巳鄂勒哲等奏

定銓調選法庚午以陝西行省平章額森特穆爾為中

書平章政事中書省左丞梁溫都爾為中書右丞癸酉

太陰掩軒轅大星暈于柳林免武當山新附軍徭賦甲

戌西番寇階州陝西行省平章圖魯卜以兵進討其黨

悉平留軍五百人戍之詔各省合併鎮守軍福建所置

者合為五十三所江浙所置者合為二百二十七所丙子車駕幸上都丁丑封諸王特穆爾布哈為鎮西武靖王賜馳紐印以江西省左丞巴特瑪新為中書左丞庚辰扎爾古齊都爾蘇受賂為其奴所告毒殺其奴坐棄市乙酉遣阿里以鈔八萬錠糴糧和琳丁亥禁正月至七月捕獵大都八百里內亦如之庚寅立江淮等處財賦總管府及提舉司賜諸王永和爾及烏魯斯布哈金各百兩烏魯斯布哈母額卜齊等金五百兩銀鈔有差

賜青海匠戶市農具鈔二萬二千九百餘錠及伊克圖所部貧戶萬錠布濟克鞮匠一萬九百餘錠五臺山佛寺成皇太后將親往祈祝監察御史李元禮上封事止之歸德徐邳汴梁諸縣水免其田租道州旱遼陽饑並命發粟賑之永和爾及烏魯斯布哈所部民饑以乳牛牡馬濟之夏四月癸巳朔日有食之丙申中書省御史臺臣言阿喇卜丹及崔彧條陳臺憲諸事臣等議乞依舊例御史臺不立選其人則於常調官選之惟監察

御史首領官令御史臺自選各道廉訪司必擇蒙古人  
為使或闕則以色目世臣子孫為之其次參以色目漢  
人又哈喇齊阿蘇各舉監察御史非便亦宜止於常選  
擇人各省文案行臺差官檢覈宿衛近侍奉特旨令臺  
憲擢用者必須明奏然後任之行臺御史秩滿而有效  
績者或遷內臺或呈中書省遷調廉訪司亦如之其不  
稱職者省臺擇人代之未歷有司者授以牧民之職經  
省臺同選者聽御史臺自調中書省或用臺察之人亦

宜與御史臺同議各官府憲司官毋得輒入體察今擬  
除轉鹽運使司外其餘官府悉依舊例制曰可壬寅賜  
烏魯斯布哈圓符賜暹國羅斛來朝者衣服有差賜伊  
克圖所部鈔萬錠給永和爾所部和琳屯田種以米二  
千石賑應昌府五月丙寅河決汴梁發民三萬餘人塞  
之戊辰安南國遣使來朝追收諸位下為商者制書驛  
券命回回人在內郡輸商稅給鈔千錠建臨洮佛寺詔  
強盜姦傷事主者首從悉誅不傷事主止誅為首者從

者刺配再犯亦誅給葛蠻安撫司驛券一辛未遂寧州  
軍戶任福妻一產三男給復三歲癸酉太白犯鬼積尸  
氣乙亥太陰犯房丁丑禁民間捕鬻鷹鷄庚寅平伐酋  
領內附乞隸於亦乞不詳從之各路平準行用庫舊制  
選部民富有力者為副命自今以常調官為之隸行省  
者從行省署用上思州叛賊黃勝許遣其子志寶來降  
漳河溢損民禾稼饒州鄱陽樂平及隆興路水伊奇哩  
等二站饑賑米一百五十石六月甲午諸王伊爾根遣



使乘驛祀五嶽四瀆命追其驛券仍切責之以湖廣行

省參政崔良知廉貧特賜鹽課鈔千錠給和琳軍需鈔

十萬錠乙未太白晝見戊戌平伐九寨來降立長官司

己酉令各部宿衛士輸上都隆興糧各萬五千石于北

地甲寅罷亦奚不薛歲貢馬及氊衣丙辰監察御史鄂

蘭實喇言中丞崔彧兄在先朝嘗有罪還其所籍家產

非宜又買僧寺水碾違制帝以其妄言笞之詔僧道犯

姦盜重罪者聽有司鞠問賜諸王伊爾根等從者鈔二

萬錠圖沙瑪一十三站貧民五千餘錠是月平灤路虫  
食桑歸德徐邳州蝗太原風雹河間大名路旱和州歷  
陽縣江漲漂沒廬舍萬八千五百餘家以糧四千餘石  
賑廣平路饑民萬五千石賑江西被水之家二百九十  
餘石賑特爾格四站戶秋七月庚午太陰犯房辛未賜  
諸王托克托博囉齊沙克多爾鈔二千錠所部八萬四  
千餘錠實都實喇千錠所部二萬餘錠罷蒙古軍萬戶  
府入察遜塔拉都元帥府癸未增晉王所部屯田戶甲

申增中御府官一員賜馬八兒國塔喜二珠虎符詔出使招諭者授以招諭使副諸取藥物者授以會同館使副但降旨差遣不給制命丙戌以巴爾斯圖倉糧隸上都留守司招籍宋兩江鎮守軍丁亥免上都酒課三年賜諸王巴延特穆爾及弟伯竒博羅特鈔四千錠所部八萬四千八百餘錠仍給糧一年寧海州饑以米九千四百餘石賑之河決杞縣蒲口郴州路耒陽州衡州之邇縣大水山崩溺死三百餘人懷州武陟縣旱八月庚

子詔赫伯留軍五千屯守令博羅統其餘衆以歸丁未

命諸王阿濟格自今出獵悉自供具毋傷民力丁巳祆

星出奎揚州淮安寧海州旱真定河間順德旱疫池州

南康寧國太平水九月辛酉朔祆星復犯奎壬戌八番

順元等處初隸湖廣後改隸雲南雲南戍兵不至其屯

駐舊軍逃亡者衆仍命湖廣行省遣軍代之甲子八百

媳婦叛寇徹里遣額森布哈將兵討之丙寅詔恤諸郡

水旱疾疫之家罷括兩淮民田汰諸王來大都者及宿

衛士冗員丁卯命平章巴延專領給賜孤老衣糧壬午

車駕還大都己丑增海漕為六十五萬石罷南丹州安

撫司立慶遠南丹溪洞等處軍民安撫司詔邊遠官已

嘗優陞品級而托他事不起者奪其所陞官平珠六洞

蠻及十部洞蠻皆來降命以蠻夷官授之給衛士牧馬

外郡者糧令毋仰食於民以札爾古齊所追贓物輸中

書省衛輝路旱疫澧州常德饒州臨江等路溫之平陽

瑞安二州大水鎮江之丹陽金壇旱並以糧給之冬十

月甲午詔諸遷轉官注闕二年丁酉有事于太廟辛丑  
減上都商稅歲額為三千錠温州陳空崖等以妖言伏  
誅癸丑免陝西鹽戶差稅罷其所給米乙卯瓜哇遣失  
刺班直木達奉表來降戊午太白經天增吏部尚書一  
員以朶甘思十九站貧乏賜馬牛羊有差廬州路無為  
州江湖泛溢漂沒廬舍歷陽合肥梁縣及安豐之蒙城  
霍邱自春及秋不雨揚州淮安路饑韶州南雄建德温  
州皆大水並賑之十一月壬戌禁權豪僧道及各位下

擅據鑛炭山場罷順德彰德廣平等路五提舉司立都  
提舉司二陞正四品設官四員直隸中書戶部衛輝路  
提舉司隸廣平彰德都提舉司真定鐵冶隸順德都提  
舉司罷保定紫荊關鐵冶提舉司還其戶八百為民癸  
亥詔自今田獵始自九月高麗王王昨告老乞以爵與  
其子諫福建行省遣人覘瑠求國俘其傍近百人以歸  
戊辰增太廟牲用馬庚午籍唐古軍入樞密院辛未曹  
州禹城進嘉禾一莖九穗丁丑詔以高麗王世子諫為

開府儀同三司征東行中書省左丞相駙馬上柱國高麗國王仍加授王昨為推忠宣力定遠保節功臣開府儀同三司太尉駙馬上柱國逸壽王增烏撒烏蒙等處宣慰司一員以博爾歡為之賜諸王烏魯斯布哈金千兩銀萬五千兩鈔萬錠徙大同路軍儲所于紅城以河南行省經用不足命江浙行省運米二十萬石給之總帥汪惟和以所部軍屯田沙州瓜州給中統鈔二萬三千二百餘錠置種牛田具大都路總管實迪坐贓當罷



帝以故臣子特減其罪俾仍舊職崔彥言不可復任帝  
曰卿等與中書省臣戒之若後復然則置爾死地矣戊  
子太白經天增晉王內史一員尚乘寺卿一員賜永和  
爾金一千二百五十兩銀一萬五千兩鈔一萬二千錠  
常德路大水常州路及宜興州旱並賑之十二月癸巳  
令蘇伊岱爾雅爾哈將兵出征丙申徙襄陽屯田哈喇  
古勒軍于南陽戶受田百五十畝給種牛田具戊戌中  
書省臣同河南平章博爾歡等言世祖撫定江南沿江

上下置戍兵三十一翼今無一二懼有不虞外郡戍卒封樁錢軍官遷延不以時取而以己錢貸之徵其倍息逃亡者各處鎮守官及萬戶府並遣人追捕皆非所宜又富戶規避差稅冒為僧道且僧道作商賈有妻子與編氓無異請汰為民宋時為僧道者必先輸錢縣官始給度牒今不定制僥倖必多無為磬課初歲入為鈔止一百六錠續增至二千四百錠大率斂富民刻吏俸停竈戶工本以足之亦宜減其數帝曰磬課遣人覈實汰

僧道之制卿等議擬以聞軍政與樞密院議之諸王伊  
奇哩部呼喇岱於濟南商河縣侵擾居民蹂踐禾稼帝  
命詰之走歸其部帝曰彼宗戚也有是理耶其令伊奇  
哩罪之禁諸王駙馬并權豪毋奪民田其獻田者有刑  
復立芍陂洪澤屯田壬寅朝洞蠻內附立長官司二命  
楊漢英領之甲辰太白經天又犯東咸丙午太陰犯軒  
轅丁未旌表烈婦漳州招討司知事閩文興妻王氏戊  
申增給雲南廉訪司驛券十二甲寅太陰犯心乙卯免

上都至大都并宣徽等十三站戶和顧和買賜諸王呼  
喇珠鈔千錠所部四萬四千五百餘錠諸王阿珠蘇克  
特穆爾所部二萬八千九百餘錠閏十二月壬戌太陰  
犯壘壁陣命伊蘇岱爾等出征詔諸軍戶賣田者由所  
隸官給文券甲子福建平章高興言漳州漳浦縣大梁  
山產水晶乞割民百戶采之帝曰不勞民則可勞民勿  
取壬申徙納延民戶于內地定雅克托果斯所隸戶差  
稅以三分之一輸官賜呼喇珠部鈔萬錠癸酉至丙子

太白犯建星己卯賜布色圖卜千戶等鈔約九萬錠淮東饑遣參議中書省事于章發廩賑之弛湖泊之禁仍聽正月捕獵平伐等蠻未附播州宣撫使楊漢英請以己力討之命湖廣省達爾罕從宜收撫瓜州屯田軍萬人貧乏命減一千以張萬戶所領兵補之甲申增兩淮屯田軍為二萬人賜諸王阿雅噶齊鈔千錠所部一萬一千餘錠雅爾哈等所部七萬錠溫都爾和卓所部四萬餘錠般陽路饑疫給糧兩月是歲濟南及金復州水

旱大都之檀州順州遼陽瀋陽廣寧水順德河間大名  
平陽旱河間之樂壽交河疫死六千五百餘人斷大辟  
百七十五人

二年春正月壬辰詔以水旱減郡縣田租十分之三傷  
甚者盡免之老病單弱者差稅並免三年禁諸王公主  
駙馬受諸人呈獻公私田地及擅招戶者丙申遣使閱  
諸省兵丁酉置汀州屯田辛丑御史臺臣言諸轉運司  
案牘例以歲終檢覆金穀事繁稽照難盡奸偽無從知

之其未終者宜聽憲司於明年檢覆從之乙巳以糧十萬石賑北邊內附貧民己酉建康龍興臨江寧國太平廣德饒池等處水發臨江路糧三萬石以賑仍弛澤梁之禁聽民漁采所得瑠求人歸告其國而使之效順併土番碣門安撫使運司改為碣門魚通黎雅長沙西寧遠軍民宣撫司以翰林王暉閻復王構趙與熹王之綱楊文郁王德淵集賢王顥宋渤盧摯耶律有尚李泰郝采楊麟皆耆德舊臣清貧守職特賜鈔二千一百餘錠

給西平王鄂囉齊部民糧三月晉王秣米五百石所部  
鈔十二萬錠戍和琳高麗女直漢軍三萬錠二月戊午  
朔詔樞密院合併貧難軍戶辛酉歲星熒惑太白聚危  
熒惑犯歲星壬戌徙重慶宣慰司都元帥府於成都立  
軍民宣慰司都元帥府於福建乙丑立浙西都水庸田  
司專主水利以中書右丞徽政院副使張九思為平章  
政事與中書省事丁卯改泉州為泉寧府己巳畋于鄴  
州辛未太陰犯左執法併江西省元分置軍為六十四



所丙子太陰犯心帝諭中書省臣曰每歲天下金銀鈔幣所入幾何諸王駙馬賜與及一切營建所出幾何其會計以聞右丞相鄂勒哲言歲入數金一萬九千兩銀六萬兩鈔三百六十萬錠然猶不足於用又於至元鈔本中借二十萬錠自今敢以節用為請帝嘉納焉罷中外土木之役癸未詔諸王駙馬毋擅祀嶽鎮海瀆申禁諸路軍及豪右人等毋縱畜牧損農乙酉車駕幸上都罷建康金銀銅冶轉運司還淘金戶於元籍歲辦金悉

責有司詔廉訪司作成人材以備選舉禁諸王從者假  
控鶴佩帶擾民詔諸郡凡民播種怠惰及有司勸課不  
至者各道廉訪司治之減行省平章為二員丙子以梁  
德珪為中書平章政事楊炎龍為中書右丞賜扎濟古  
爾所部鈔三十萬錠近侍巴延特穆爾等二萬錠額森  
特穆爾等市馬價三萬四千四百餘錠鎮南王托歡六  
萬錠浙西嘉興江陰江東建康溧陽池州水旱並賑恤  
之湖廣省漢陽漢川水免其田租甘肅省沙州鼠傷禾

稼大都檀州雨雹歸德等處蝗三月丁亥朔罷大名路  
故河堤堰歲入隆福宮租鈔七百五十錠申禁官吏受  
賂詣諸司首者不得輒受戊子詔僧人犯奸盜詐偽聽  
有司專決輕者與僧官約斷約不至者罪之庚寅命各  
萬戶出征者其印令副貳掌之不得付其子弟違法行  
事以兩淮閑田給蒙古軍壬子御史臺臣言道州路達  
魯噶齊額哩音布哈總管周克敬虛申麥熟不賑饑民  
雖經赦宜降職一等從之壬子詔加封東鎮沂山為元

德東安王南鎮會稽山為昭德順應王西鎮吳山為成  
德永靖王北鎮醫巫閭山為貞德廣寧王歲時與嶽瀆  
同祀著為令式夏四月戊午遣征布拉坦軍還本部庚  
申以伊蘇岱爾擅調甘州戍軍遣巴延等笞之賜大都  
守門哈喇齊等鈔九萬錠織工四萬四千錠發慶元糧  
五萬石減其直以賑饑民江南山東江浙兩淮燕南屬  
縣百五十處蝗五月辛卯罷海南黎兵萬戶府及黎蠻  
屯田萬戶府以其事入瓊州路軍民安撫司罷葶麻林

酒稅羨餘壬辰以中書右丞何榮祖為平章政事與中書省事湖廣左丞巴特瑪新為中書右丞淮西諸郡饑漕江西米二十萬石以備賑貸命中書省遣使監雲南四川海北海南廣西兩江廣東福建等處六品以下選戊戌太陰犯心壬寅平灤路旱發米五百石減直賑之己酉諸王尼格布拉克妃扎哈沁詐增所部貧戶冒支鈔萬六百餘錠遣扎爾古齊同王府官追之南輝順德旱大風損麥免其田租一年詔總帥汪惟正所轄二十

四城有安西王諸王等并圖沙瑪來寓者與編戶均當  
賦役耽羅國以方物來貢撫州之崇仁星隕為石復致  
用院置和琳宣慰司都元帥府以呼喇珠耶律希周納  
琳哈喇並為宣慰使都元帥佩虎符給兩都巴喇噶齊  
鈔各三萬錠六月庚申御史臺臣言江南宋時行兩稅  
法自阿爾哈雅改為門攤增課錢至五萬錠今宣慰張  
國紀請復科夏稅與門攤并徵以圖陞進湖湘重罹其  
害帝命中書趣罷之禁權豪鄂拓克括大都漕河舟楫

西臺侍御史托歡以受賂不法罷禁諸王擅行令旨越  
例開讀者併所遣使拘執以聞壬戌太陰犯角詔陝西  
諸色戶與民均當徭役申嚴陝西運司私鹽之禁置奉  
宸庫賜諸王永和爾金一千二百五十兩烏魯斯布哈  
併其母金一千兩銀鈔有差山東河南燕南山北五十  
處蝗山北遼東道大寧路金源縣蝗秋七月癸巳太陰  
犯心汴梁等處大雨河決壞堤防漂沒歸德數縣禾稼  
廬舍免其田租一年遣尚書諾海御史劉賡等塞之自

蒲口首事凡築九十六所壬寅詔諸王駙馬及諸近侍

自今奏事不經中書輒傳旨付外者罪之高麗王王諤

擅命妄殺詔遣中書右丞楊炎龍僉樞密院事洪君祥

召其入侍以其父昨仍統國政詔賜諸王琳沁等金銀

鈔有差江西江浙水賑饑民二萬四千九百有奇八月

壬戌太陰犯箕癸未給四川出征蒙古軍馬萬匹九月

己丑聖誕節駐驛實桂之地受諸王百官賀交趾瓜哇

金齒國各貢方物給和琳更戍軍牛車丙申車駕還大



都辛丑太陰犯五車南星命廣海左右江戍軍依舊制  
以二年或三年更代癸卯太陰犯五諸侯樞密副使塔  
爾古岱犯贓罪命御史臺鞠之己酉太陰犯左執法庚  
戌吉贛立屯田減中外冗員冬十月甲寅朔增海漕米  
為七十萬石壬戌太白犯牽牛置蒙古都萬戶府於鳳  
翔立平珠六洞蠻夷長官司二設土官四十四員戊寅  
太陰犯角距星令御史臺檢劾樞密院案牘賜諸王永  
和爾烏魯斯布哈所部糧五萬石控鶴軍七百人賜鈔

五百錠十一月庚寅安南貢方物丙申知樞密院諾海  
言常劄文移乞令副樞以下署行從之罷雲南行御史  
臺置肅政廉訪司己亥太陰犯輿鬼辛丑辰星犯牽牛  
罷徐邳鑪冶所進息錢壬寅太陰犯右執法以中書右  
丞王慶端為平章政事賜和琳軍校幣六千疋衣帽等  
物有差十二月戊午太白經天己未填星犯輿鬼乙丑  
太白犯歲星太陰犯熒惑括諸路馬除牝孕攜駒者齒  
三歲以上並拘之賜托多爾海所部鈔八十五萬錠庚

午鎮星入輿鬼太陰犯上將辛未增置各路推官專掌  
刑獄上路二員下路一員詔諸逃軍復業者免役三年  
江浙行省平章政事達爾罕陞左丞相甲戌彗出于孫  
星下己卯太陰犯南斗辛巳命廉訪司歲舉所部廉幹  
者各二人詔和市價直隨給其主違者罪之定諸稅錢  
三十取一歲額之上勿增揚州淮安兩路旱蝗以糧十  
萬石賑之給陣亡軍妻子衣糧免內郡賦稅諸王錫錫  
所部三百餘戶散處鳳翔以潞州田二千八百頃賜之

釋在京囚二百一十九人

元史卷十九

元史卷十九考證

成宗本紀元貞二年三月庚午中書左丞梁溫都爾為  
中書右丞 案溫都爾即梁德珪也

八月己丑詔增海漕為六十五萬石 案原本六十五  
萬石作六千五萬石考元貞間始增海漕為六十萬  
石大德二年增為七十萬石是年但增五萬石耳且  
元時海漕最多亦止百萬石千字之誤無疑今改





總校官編修臣吳紹深